

soure. Et en ceste mainere vait por toutes les provences et reingnes dou grant sire. Et quant les mesajes vont por desviabiles leus que ne i trouve ne maison ne herberges, si hi a fait faire le grant sire poste en chascun leu desviable et palais et toutes les chouses come ont les autres postes, et des chevaus et de arnois, mès ce sunt plus grant journée : car il sunt faites les postes à trente cinc miles, et tiel hi a à plus de quarante, et en ceste mainere qe vos avés hoï vunt por toutes pars les mesajes dou grant sire, et hont herbergies, et chevaus aparoilés à ogne journée, et ce est bien la greingnor autesse et la grandese greingor qe aie ne haüst onques nul enperaors, ne nulz rois, ne nul autre homes teroine. Car sachiés tout voiremant que plus de deus cent mille chevaus demorent à cestes postes propemant por les sez mesejes, et encore voz di que les paleis sunt plus de dix mille qe sunt ensi forni de riches arnois con je voz ai contés, et ce est chouse si merveilose et de si grant vailance, qe à poine se poroit bien conter ne scrivre. Et encore voz conterai una cause qe je avoit dementique, qe fait à nostre materie qe je vos ai ore contés. Il est voir qe entre le une poste et l'autre sunt ordree ogne trois mile ha un chausaus, qe hi poit avoir entor quarante maison esquelz demorent homes à piés qe encore font ceste mesajarie dou grant sire, et voz dirai comant; il portent une grant centure toute pleine environ de sonaille, por ce qe quant il vont qe il soient oï de bien longe, et cesti vont toutes foies au grant gallon, et ne vont for que trois moilles; et les autres qe est à chief des les trois miles qe bien de longe le oient venir, demore tout aparoilés, et tant tost qu'il est celui venu il prant la chouse qu'il aporte, et prant une carte petite qe li done l'escrivain, et se met corant, et vait jusque à le trois autre miles et fait ausi come avoit fait le autre. Et si voz di qe en ceste mainere ha le grant sire de cesti homes à pié noveles des dix journée en un jorno et en une noit. Car sachiés qu'il vont cesti homes à piés en un jor et en une noit dix journée, et en deus jors et deus noit aportent noveles de vingt journée, et ausi auroit noveles en dix jors et en dix nuit de cent journée. Et si voz di qe cesti tielz homes aportent au seingnors plu